

Na osnovu člana 30. stav (1) tačke n) i stava (2) i člana 44. Zakona o plaćama i naknadama u institucijama Bosne i Hercegovine ("Službeni glasnik BiH", broj 50/08 i 35/09), člana 50. stav 4. tačke e) Zakona o radu u institucijama Bosne i Hercegovine ("Službeni glasnik BiH", broj 26/04, 7/05 i 48/05) i člana 17. Zakona o Vijeću ministara Bosne i Hercegovine ("Službeni glasnik BiH", broj 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 97. sjednici, održanoj 3. septembra 2009. godine, donijelo je

ODLUKU

O NAČINU I POSTUPKU OSTVARIVANJA PRAVA NA NAKNADU ZA OBRAZOVANJE I STRUČNO USAVRŠAVANJE U INSTITUCIJAMA BOSNE I HERCEGOVINE

Član 1. (Predmet Odluke)

Ovom Odlukom uređuje se način i postupak ostvarivanja prava zaposlenih u institucijama Bosne i Hercegovine na naknadu za stručno obrazovanje, usavršavanje i obučavanje, u skladu sa članom 44. Zakona o plaćama i naknadama u institucijama Bosne i Hercegovine i članu 50. stav 4. tačka e) Zakona o radu u institucijama Bosne i Hercegovine.

Član 2. (Pojam i vrste stručnog obrazovanja, usavršavanja i obučavanja)

- (1) Pod stručnim obrazovanjem, u smislu člana 44. Zakona o plaćama i naknadama u institucijama Bosne i Hercegovine, podrazumijeva se sticanje višeg stepena obrazovanja i time povećanje radnih i stručnih sposobnosti, a isto obuhvata: specijalističke, magistarske i doktorske studije.
- (2) Pod usavršavanjem i obučavanjem, u smislu člana 44. Zakona o plaćama i naknadama u institucijama Bosne i Hercegovine, i obrazovanjem, u smislu člana 50. stava 4. tačke e) Zakona o radu u institucijama Bosne i Hercegovine, podrazumijeva se sticanje određenih znanja i polaganja stručnih ispita kojima se ne stiče viši stepen obrazovanja, ali se stiču ili polaganjem ispita potvrđuju znanja potrebna za kvalitetno obavljanje poslova i radnih zadataka, te isto obuhvata: usavršavanje u skladu sa programima obuke kadrova u državnoj službi, obuku zaposlenih za vršenje zadataka i obaveza u opisu zadataka radnog mjesta, kongrese, simpozije, kurseve, seminare i savjetovanje u zemlji i inostranstvu, učenje stranih jezika i druge vrste usavršavanja i obučavanja.

Član 3. (Pojam naknade za stručno obrazovanje, usavršavanje i obučavanje)

Naknada za stručno obrazovanje, usavršavanje i obučavanje obuhvata: naknadu za službeno putovanje u skladu sa podzakonskim aktom koji reguliše ovu oblast, naknadu plaće u skladu sa Odlukom o načinu i postupku ostvarivanja prava na naknadu za godišnji odmor i plaćeno odsustvo u institucijama Bosne i Hercegovine i naknadu troškova stručnog obrazovanja, usavršavanja i obučavanja (troškovi kotizacije i sl.).

Član 4. (Ostvarivanje prava na naknadu za stručno obrazovanje)

- (1) Pravo na naknadu za stručno obrazovanje zaposleni u institucijama Bosne i Hercegovine ostvaruju na osnovu programa stručnog obrazovanja koji za pojedine oblasti donosi Vijeće ministara Bosne i Hercegovine na prijedlog resornog ministarstva i uz prethodno pribavljeno mišljenje Ministarstva finansija i trezora i Ureda za zakonodavstvo.
- (2) Međusobni odnosi institucije Bosne i Hercegovine i zaposlenika koji se upućuje na stručno obrazovanje regulisat će se posebnim ugovorom na osnovu odredbi ove Odluke i odobrenog programa stručnog obrazovanja.
- (3) Pitanje visine naknade troškova za stručno obrazovanje (iznos koji institucija Bosne i Hercegovine sufinansira), vremenskog roka u kome je zaposleni, koji se upućuje na stručno obrazovanje, dužan ostati na radu u institucijama Bosne i Hercegovine i druga bitna pitanja koja nisu regulisana odredbama ove Odluke predstavljaju obavezan sadržaj programa stručnog obrazovanja.

Član 5.

(Postupak i način ostvarivanja prava na naknadu)

- (1) Da bi zaposleni ostvario pravo na naknadu za stručno obrazovanje, usavršavanje i obučavanje, dužan je podnijeti zahtjev za naknadu.
- (2) Zaposleni je obavezan, pored zahtjeva, priložiti dokumentaciju (račun, profakturu i sl.) izdanu od strane institucije koja pruža usluge stručnog obrazovanja, usavršavanja i obučavanja, a kojom se dokazuje iznos troškova stručnog obrazovanja, usavršavanja i obučavanja.
- (3) Pravo na naknadu troškova za stručno obrazovanje, usavršavanje i obučavanje zaposlenih u institucijama Bosne i Hercegovine ostvaruje se:
 - a) refundacijom troškova stručnog obrazovanja, usavršavanja i obučavanja uposlenog u institucijama Bosne i Hercegovine;
 - b) uplatom troškova stručnog obrazovanja, usavršavanja i obučavanja zaposlenog na račun institucije koja organizuje stručno obrazovanje, usavršavanje i obučavanje.

Član 6.

(Obračun i isplata naknade)

- (1) Obračun i isplata naknade za službeno putovanje zaposlenom koji je upućen na stručno obrazovanje, usavršavanje i obučavanje vrši se u skladu sa odredbama podzakonskog akta koji reguliše ovu oblast.
- (2) Obračun i isplata naknade plaće zaposlenom koji je upućen na stručno obrazovanje, usavršavanje i obučavanje vrši se uz mjesečni obračun i isplatu plaća i naknada zaposlenih u institucijama Bosne i Hercegovine na osnovu ugovora iz člana 4. stav (2) ove Odluke i rješenja o plaćenom odsustvu.
- (3) Obračun i isplata naknade troškova stručnog obrazovanja, usavršavanja i obučavanja, vrši se jednokratno prema uobičajenim procedurama evidentiranja obaveza i njihovog plaćanja preko Informacijskog sistema finansijskog upravljanja (ISFU), odnosno uz mjesečni obračun i isplatu plaća i naknada zaposlenih u institucijama Bosne i Hercegovine na osnovu ugovora iz člana 4. stava (2) i dokumentacije iz člana 5. stav (2) ove Odluke.

Član 7.

(Institucije odgovorne za provedbu Odluke)

Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

Član 8.

Odluka stupa na snagu narednog dana od dana objavljivanja u "Službenom glasniku BiH".

VM broj 210/09
3. septembra 2009. godine
Sarajevo

Predsjedavajući
Vijeća ministara BiH
Dr. Nikola Špirić, s. r.